

Broj: 117-02/14

Datum: Sarajevo, 04.04.2014.

**Prima: Sekretarijat Vlade Brčko Distrikta BiH**  
**Sektor za informisanje**

**Predmet: Reagiranje Vijeća za štampu u BiH povodom neprofesionalnog tretmana portala otisak.ba**

Poštovani,

Srdačno Vas pozdravljamo iz Vijeća za štampu u Bosni i Hercegovini, samoregulacijskog tijela za štampane i online medije.

Vijeću za štampu u BiH se obratio g. Edin Ražanica, direktor i glavni i odgovorni urednik portala otisak.ba, tražeći reagiranje Vijeća za štampu u BiH povodom objave teksta pod naslovom „Demanti opskurnih konstrukcija portala 'Otisak'“, 04.03.2014. godine na zvaničnoj web stranici Vlade Brčko Distrikta BiH.

Vijeće za štampu u BiH je samoregulacijsko tijelo koje štiti medije od političkih, ekonomskih i drugih oblika pritisaka, također štiti javnost od neprofesionalnog i manipulativnog izvještavanja medija. U tome svom kapacitetu upućujemo vam ovaj dopis.

Vlada Brčko Distrikta je imala obavezu, prije postavke teksta „Demanti opskurnih konstrukcija portala 'Otisak'“ na svoju zvaničnu web stranicu, tražiti od uredništva portala otisak.ba da objavi ispravku eventualnih pogrešnih navoda u originalno objavljenom članku, dajući konkretne protunavode navodima u originalno objavljenom članku na ovom portalu. Vlada to nije učinila. Umjesto slanja ispravke pogrešnih navoda uredništvu portala sa zahtjevom njihove objave, Vlada Brčko Distrikta BiH je (zlo)upotrijebila svoju zvaničnu web stranicu za svojevrsan obračun sa ovim medijem. To je neprimjeren način reagiranja na izvještavanje portala otisak.ba, s ciljem profesionalne diskreditacije medija i javnim pritiskom na uređivačku politiku medija.

Vijeće za štampu ne spori pravo Vlade Brčko Distrikta BiH da izrazi nezadovoljstvo načinom izvještavanja portala otisak.ba, naprotiv, ohrabruje jačanje novinarskog profesionalizma putem ulaganja žalbi na netačno medijsko izvještavanje, u skladu sa žalbenom procedurom Vijeća za štampu u BiH.

S toga Vas pozivamo da svoje buduće eventualne prigovore i reagiranja na izvještavanje štampe i online medija u BiH uputite redakciji medija čije izvještavanje smatrate neprofesionalnim, te kopiju žalbe uputite i Vijeću za štampu u BiH, u skladu sa žalbenom procedurom samoregulacije medija. Vijeće za štampu u BiH, kao samoregulacijsko tijelo za

štampane i online medije, brzo, efikasno i besplatno posreduje kao medijator između nezadovoljnih klijenata i medija. Vaš će demati, ispravka ili reagiranje biti objavljeno u mediju, i na taj će način medij svojim čitateljima dati nove informacije u skladu s reagiranjem. To je profesionalni način reakcije. Objava teksta „Demanti opskurnih konstrukcija portala 'Otisak'“ na zvaničnoj stranici Vlade Brčko Distrikta nije.

Način na koji ste vi u ovom slučaju postupili nije u skladu sa demokratskim principima poštivanja slobode medija, već je pokušaj diskreditacije portala otisak.ba u javnosti. Taj čin nije u skladu sa djelovanjem jedne vlade u demokratskom društvu, i ljubazno vas pozivamo da ubuduće ispravke pogrešnih navoda u medijima tražite legalnim putem, i bez ugrožavanja slobodnog rada uredništva medija na koji se žalite.

Samo uz profesionalnu komunikaciju, dijalog i saradnju, uz međusobno razumijevanje i uvažavanje specifičnosti uloge medija s jedne i organa vlasti s druge strane u demokratskom društvu, i mediji i Vlada Brčko Distrikta BiH mogu na najbolji mogući način služiti interesu javnosti i građanima.

Na raspolaganju smo vam za sva pitanja, budite slobodni obratiti nam se.

Sve informacije o načinu ulaganja žalbi na izvještavanje štampe i online medija i žalbenoj proceduri Vijeća za štampu u BiH nalaze se na web stranici Vijeća za štampu u BiH [www.vzs.ba](http://www.vzs.ba)

S poštovanjem,

Ljiljana Zurovac

Izvršna direktorica  
Vijeće za štampu u BiH